

甘水仙源錄卷之二

息三

夷門天樂道人李廷謙集

長生真人劉宗師道行碑 奉志安撰

夫欲襲氣母舍元精探混茫窺杳冥縮地脉  
袖天扁毫芒太虛塵芥無 鞭烈缺筮靈

躡汗漫肩鴻濛萬物之所待而成一化之所  
係而靈者豈尋常下士蹇淺小夫之所能哉  
今夫東萊長生真人卯金右族炎漢遺英矯  
矯雲翮堂堂嶽精湖海不足以盡其涵容星  
斗不足以極其高明乃祖乃父世居武官好  
陰德樂推恩恤寒餒孤博捨良田八十餘  
頃與龍興巨刹以為常住種福之根當前宋  
太平興國間朝廷嘉厥孝義旌表門閭蠲免  
租征光照連郡天不負仁自紅霞丹景中選  
擇其仙材之精明者降瑞於掖城既挺世也  
謹事孀母特以孝聞誓不婚宦憎華醜榮清  
淨自守希夷若昏顧世間物無足以撼其胃  
中之誠屢辭故山欲訪異人而慈親眇眇然  
未之許也大定己丑之春忽於隣居壁間人  
所不能及處揮灑二頌而墨跡尚新不留姓

名其末句云武官養性真仙地須有長生不  
死人先生嘆賞其筆力道勁疑神物之所化  
成而未能決其信情是歲九月霜寒露清重  
陽祖師杖屨西行携丘譚馬三仙之英度海  
岳歷山城先生聞之竭蹶而趨香火而迎祖

師顧而笑曰壁間墨痕汝知之乎三子者亦  
相視而冰晒方悟其頌乃神通變現之所以  
相驚也於是鏤肝薦誠刻骨效盟負几杖執  
巾瓶左右惟命死生自程祖師愛其懇懇美  
其專精顧其神彩之不群乃嘆曰松之月竹  
之雪故不受於黃塵贈之詩曰釣罷歸來又  
見鰲已知有分列仙曹鳴榔相喚知予意躍  
出洪波萬丈高仍取壁間語意以長生為之  
號處玄為之諱通妙為之字時方弱冠之明  
年也丘劉譚馬之名充塞乎九野八絃遊汗  
梁寓夷門乞食鍊形隱姓埋名朝叩暮請行  
薰坐蒸委曲而挑幹玄機丁寧而啓迪丹經  
掃惑雲津迷冰祖師既盡付其四象五行乃  
遺物離人而退藏于天所謂得知友而赴蓬  
瀛也四子乃負仙骸報洪恩叩成陽歷華陰

寧神於劉將舊廬之坳四子之志各異先生  
獨遁跡於洛京鍊性於塵埃混合之中養素  
於市廛雜沓之叢管絃不足以滑其和花柳  
不足以撓其精心灰為之益寒形木為之不  
春人饋則食不饋則殊無愠容人問則對之

以手不問則終日純純定力圓滿天光發明  
乃遷於雲溪之濱門人為之穿洞室於巖根  
忽遇石井寒泉泠泠衆駭其異先生笑曰二  
速數尺更有二井乃我宿生修煉之所經營  
也擊之果然迄今洞宮號為三泉逮丙申歲  
復還武官往拜母氏相見甚懽卜太基之陰  
麓建靈虛之祖堂手植檜柏蒼翠成行居無  
何鄉里誣告先生殺人輒不辯而就縛坐狴  
犴者近將十旬純陽祖師聽玉漏駕蒼麟下  
碧霄入幽圜就松尾付管城教之習文後殺  
人者自首先生得以免縲絏之刑比其出也  
翰墨絕妙有龍蛇飛舉之形大定戊申主黜  
于昌陽絲雲覆壇白鶴舞庭是歲也秋早如  
焚復披禱雨之誠既登厥壇四望無雲曰來  
朝巳午之交當有甘澍如傾言出有徵如影

響之應形聲自後東州懸壺獨師主盟必有  
 祥風泠泠捲縹帶而上騰其威應也如神迄  
 今諸郡石刻猶存至承安之三年也章宗聞  
 其道價鏗鉤乃遣使者徵之鶴板蒲輪接於  
 紫宸待如上賓賜以琳字名曰修真官僚士  
 庶絡繹相仍戶外之履無時不盈明年三月  
 乞還故山天子不敢臣額賜靈虛寵光祖庭  
 迨癸亥歲二月仲春初六吉辰鳴鼓集衆告  
 之以闔苑之行曲眠左肱脩然返真祥光氤  
 氳瑞氣紛綸所有遺文仙樂太虛盤陽同塵  
 安閑修真仍注道德演陰符述黃庭與涉理  
 窟條達聖真足以為萬世之規繩披雲宋君  
 襲教軫承法輪吸月之髓餐日之魂啓玄札  
 交谷神不忘千劫之恩乃紀跨鸞之盛跡  
 勒蒼山之翠珉其銘曰長生老仙主張化權  
 吞虛無吐自然乘紫雲而下遊碧海之邊遇  
 甲子天元之會契重陽多劫之緣擅百關通  
 九泉驅四獸耕三田坐洛陽之市井擊雲漢  
 之洞天融白雪以成粉熟玄霜而不煙聲名  
 篋鼓於鳳州光華照耀於金蓮構靈虛之紺

字拜朝廷之紫宣還斷東萊之宿債然後骨  
 肉都融而遊宴八審也

長春真人本行碑

微通居士陳時可撰

戊子之秋八月丙午余自山東抵京城館于  
 長春宮者六旬將徙居清和子尹公謂余曰  
 我先師真人既葬矣當有碑知先師者君最  
 深願得君之詞刻之以示來世余再讓于者  
 宿且以晚塗思瀾不足以發明老仙為解弗  
 從也乃命其法弟玄通大師李君浩然狀老  
 仙之行謁文于余曰父師長春子姓丘氏諱  
 處機字通密登州棲霞人幼聰敏日記千餘  
 言能久而不忘未冠學道遇祖師重陽子于  
 崑崙山之煙霞洞祖師知其非常人也以金  
 鱗頌贈之遂執弟子禮尋長生劉公長真譚  
 公丹陽馬公皆造席下相視莫逆世謂之丘  
 劉譚馬焉大定九年從祖師遊梁明年祖師  
 狀世十有二年師泊丹陽公護仙骨歸終南  
 葬于其故里師乃入磻溪穴居日乞一食行  
 則一簞雖單瓢不置也人謂之簞衣先生畫

夜不寐者六年既而隱隴州龍門山七年如  
 在磻溪時其志道如此道既成遠方學者咸  
 依之京兆統軍夾谷公奉疏請還祖師之舊  
 隱師既至構祖堂輪奐餘悉稱是諸方謂之  
 祖庵玄風愈振二十八年春師以道德升聞  
 徵赴京師官建庵于萬寧宮之西以便咨訪  
 夏五月召見于長松島秋七月復見師剖析  
 至理進瑤臺第一層曲眷遇至渥翌日遣中  
 使賜上林桃師不食茶果十餘年矣至是取  
 其一啖之重上賜也八月得旨還終南仍賜  
 錢十萬表辭之爾後復居祖庵明昌二年東  
 歸棲霞乃大建琳宮勅賜其額曰太虛氣象  
 雄偉為東方道林之冠泰和間元妃重道遙  
 禮師禁中遺道經一藏師既居海上達官貴  
 人敬奉者日益多定海軍節度使劉公師魯  
 鄒公應中二老當代名臣皆相與交貞祐甲  
 戌之秋山東亂駙馬都尉僕散公將兵討之  
 時登及寧海未服公請師撫諭所至皆投戈  
 拜命二州遂定已卯之冬成吉思皇帝命侍  
 臣劉仲祿持詔迎師明年春啟行夏四月道

出居庸夜遇群盜于其北皆稽顙以退且曰無驚父師是年十月師在武川進表使回復有勅書促師西行稱之曰師曰真人其見重如此又明年春踰嶺而北壬午之四月甫達印度見

皇帝于大雪山之陽問以長生藥師但舉衛生之經以對他日又數論仁孝

皇帝以其實嘉之癸未之三月車駕至賽藍詔許師東歸且賜以贖禮師固辭曰臣歸途萬餘里得駟騎館穀足矣制可其奏因盡蠲其徒之賦役師之馳傳往返也所過迎者動數千人所居戶外之履滿矣所去至有擁馬首以泣者其感人心如此及入漢地四道流不遠千里而來所歷城郭皆挽留八月至宣德元帥邀師居真州之朝元觀明年春住燕京大天長觀行省請也自爾使者赴行宮皇帝必問神仙安否還即有宣諭語嘗曰朕所有地其欲居者居之繼而行省又施瓊華岳為觀兵革而來天長已殘廢岳尤甚師甚之工物不假化緣皆遠邇自獻者三年一新

師之在天長也靜侶雲集參叩玄旨旁門異戶靡不向風每離輒鶴見榮感犯尾宿師樓之即退舍旱魃為民虐師祈之則雨應京人歸慕建長春等八會教行四方丁亥之五月有旨以瓊華岳為萬安宮天長觀為長春宮

且授使者金虎牌持護教門六月二十有三日雷雨大作太液池之南岸崩裂水入東湖聲聞數里魚鱉悉去北口山亦摧人有亦是報者師莞爾而笑曰山摧池枯吾將與之俱手七月四日顧謂門人曰昔丹陽公嘗記余曰吾歿之後教門當大興四方往往化為道鄉公正當其時也公又當住持大宮觀其言一一皆驗吾歸無遺恨矣俄而示疾數如偃中侍者止之師曰吾不欲勞人汝等猶有分別在且偃寢奚異哉七日提舉宋道安輩請師登堂慰會衆之望師曰吾九日上堂去及是日留頌葆光而歸真焉春秋八十明年七夕前一日將葬群弟子啓棺視之師儼然如生道俗瞻禮者三日日萬人悉嘆異之九日懸畢閻仙蛻于白雲觀之處順堂師誠明慈

儉凡將帥來謁必方便勸以不殺人有急必周之士有俘于人者必授而出之士馬所至以師與之名脫欲兵之禍者甚衆度弟子皆視其才何如高者挈以道其次訓以功行又其次化以罪福罔有遺者故其生也四方之門人丹青其像事之其歿也近者號慕遠者駿奔如考妣焉及其葬也會者又萬人近世之高道福德兼備未有如師者師於道經無所不讀儒書梵典亦歷歷上口又喜屬文賦詩然未始起葉大率以提唱玄要為意雖不事雕鐫而自然成文有磻溪鳴道二集行于世云嗚呼浩然君能述其父師之道行若是昭昭然可謂能子矣又豈待鄙夫文之而後著耶雖然舉其大者論之可也我老仙生能無欲沒能不壞百世異人也又能以一介黃冠上而動人主如此下而感人心如彼非至誠粹德能然乎長松之見道已崇矣及乎至自印度教門益闢求之古人大略與冠天師相似至校其出處之道大有不同者何哉謙之之受知魏主也自言嘗遇老子授以辟殺

輕身之術及科戒使之清整道教又遇老子之玄孫授以圖籙真經天宮靜輪之法使之輔佐北方太平真君且有崔浩贊之帝始崇奉老仙則不爾方其未召也澹然海上其與世相忘久矣一日有詔迎致誠出自然非有以要之也又其所以奏對者皆以道由是推之賢於謙之遠甚是已足銘矣而沉道眼之具道行之圓乎宜乎嗣得其人世有如尹公者接跡而出以光揚妙道俾無墜耳謹系之以銘其辭曰

全真一派道為之源鼻祖其誰聖哉玄元誰其導之重陽伊始誰其大之子長春子子居磻溪一篲六年簞歌無有人皆曰賢廬于龍門亦復如是羽服來歸如渴于水子誠真仙道林之天退然其中氣吞大千世宗問道再見松島俄聽還山煙蘿甘老章廟之世作宮海濱帝妃遺經寶藏一新干戈既舉一炬焦土子率其徒往來雲嶼龍興北庭召以使星逮乎東歸道乃益弘方其生也世繪其像忽焉沒兮高堂厚葬有子克嗣尹公其人福德

兩全偉哉長春

祭文

定 庵 吳 章 撰

維丁亥歲七月十五日燕京儒學官孫周等謹以香茶之奠致祭于長春真人丘仙翁之靈嗟嗟仙翁早歲出家壯而成道九八仙而五四皓無書不覽無事不知九經庫而五總龜天下之老天子之師籍在仙班狀居塵寰舉臂汗漫騎鶴三山名滿世間千秋萬古何者為住何者為去嗣教門人結緣道友衰經滿堂如喪父母吾屬蹉跎蒙知最重奠拜靈筵哭之為慟嗚呼哀哉君壽國安師能致之含靈耳目師能啓之水旱為珍師能攘之師為飛仙何日忘之嗚呼哀哉尚饗

玉陽體玄廣度真人王宗師道行碑

銘并序

前翰林直學士奉政大夫知制誥同修國史地進撰

至元二十有四年歲丁亥秋九月提點秦蜀九路道教天樂真人李道謙偕終南上清太平宮提點賀志冲李志真來言伏讀六年詔

書今掌教光先體道誠明真人張志敬執行省節文

皇帝若曰自東華垂教至重陽開化朕心懷於追崇乃命儒臣進加徽號教主可贈東華紫府少陽帝君鍾離正陽開悟傳道真君呂真人純陽演正警化真君劉真人海蟾明悟弘道真君王真人重陽全真開化真君馬鈺丹陽抱一無為真人譚處端長真雲水蘊德真人劉處玄長生輔化明德真人丘處機長春演道主教真人王處一玉陽體玄廣度真人郝大通廣寧通玄太古真人孫不二清靜淵貞順德真人其於誅德述道聖謨天出稱情適中死濡生被道紀光賴未求萬年重惟重陽真君七弟子有婦人者一餘六真平生求道之確成道之艱尚恐行實流之人間者不託金石無以聞之將來久遠用是以禱詞臣并真君既傳六人獨是玉陽尚無屬筆敢以累君燧跡職史館以來嘗思古者史臣不要死者之或知不必生者之見求於德於功於事於言見書見而聞書聞信傳信而疑傳

疑實錄直致俾觀者自判是非於千載下細及龜筮貨殖方技滑稽隱逸卓行猶特傳之況聖皇下詔褒崇有道之真人哉固宜有述不可以吾儒者不為其道非職而辭也按事狀及顯異錄真人王姓名處一寧海東牟人以金熙宗皇統壬戌三月十八日母夢丹霞被身而生七歲無疾死而復生由是若知死生說後遇異人坐大石來前撫首與言又聞空中神自名玄庭宮主歸乃敝服赤脚狂歌市中人謂或病失心或識為無疾將收歛冠中妻之不可遂與母皆為老氏法世宗大定八年年二十七聞開化真君至州願則弟子列真君知可授其道為制今名從居崑崙煙霞洞又名其母曰德清號玄靖散人明年辭居查山真君從其徒馬無為譚蘊德丘演道郝太古四真人者自文登將歸寧海徑龍泉去查山二百里時炎暑真君持傘自手飛出未脯曠查山柄得餘陽子三字識其師蹟餘字書所無若真君特制之以號真人後有詩餘竹通為七箇又若餘為本字五人合竹二

人為七者後居雲光洞志行確苦嘗俯大壑一足跂立觀者目贖毛豎舌橋然而不能下稱為鐵脚仙洞居九年制練形魂其長春為詩頌曰九夏迎陽立三冬抱雪眠亦庶幾其跨火不焦入水不濡之徒歟遊齊魯間大肆其術度人逐鬼踏盜碎石出神入夢召兩搖峰烹雞降鶴起死噓枯麾訶嗾斥一方千里白叟黃童竭蹶其廬或以為善幻誣民因召飲可鳩真人出門戒其徒先鑿池灌水撓而濁之往則持杯盡飲曰吾貧人也無嘗從人丐取今幸見招願丐餘杯以盡君懽與之又盡飲歸解衣浴池中有頃池水沸涸以故不死猶鬚髮晃簡不纓不能受冠二十七年徵至燕京居之天長觀嘗問衛生為治對曰舍精以養神恭己以無為雖廣成復生為陛下言無易臣者世宗嘉之繼問飲鳩對曰臣素無取仇人者良由得疾致然或曰或謂異人或讒善幻世宗試而鳩之見不可殺悔怒而遂讒者嘗時諱之謬云然也明年為修具觀居不踰時求還山世宗瞞之委去其年世

宗不豫復來徵真人對使者曰吾不難斯行誠不及一仰清光矣明年正月三日下午車世宗崩已一日章宗留為醮資大行冥福其年復還山萊陽富人劉植無子六月為供致真人而薄其酒曰取汝某室藏樽養酒來植依求之則其妻密置人初不知者飲已留書四應真子曰以是嗣汝明年四月十四日真君降辰植果育子舉家喜曰四真人指月日為告耶即求子名真人曰吾已名之應真矣承安二年再徵至便殿問衛生對如告世宗者賜紫號體玄大師居之崇福觀月給錢二百緡是時呂道安將建祖庭蓋真君故廬以無物額不敢集眾真人奏立觀靈虛賜道安冲虛大師而祖庭造建始盛以母玄靖年九十求還山侍厚贖遣之泰和改元及三年詔兩設普天醮於亳州太清宮度民為道士千餘人其年玄靖逝七年居聖水玉虛觀元妃送道經一藏大安改元北京請居華陽觀庚午醮薊州玉田縣謂其徒曰若聞空中劍楮擊撞聲乎北方氣運將回生齒必有橫罹

其母者是年果天兵南牧丙子文登請居天寶觀明年丁丑四月二十三日沐浴衣冠拜上下四旁以逝年七十六有雲光集行世為其言者條分派出多於六宗數不啻萬丘演道弟子尹清和真人為道大宗視真人為叔歲乙未擇其孫清吟子劉志源俾建上清太平宮蓋由蓋屋民張守真能誦翊聖保德真君語必為今及當來休咎徵且授九壇三劍之法以捕逐鬼物宋太宗嘗勅有司作宮千柱以安景靈金季蕩焚木灰瓦屑清冷荆棘誅茅以居時日薄西山纔構宇佑一殿卒其弟子陳志玄朱志彥趙志古張志隱李志宗李志明崔志安趙志真及今賀李兩君十人相嗣為之歷四十五年構通明紫微七元三殿虛皇一壇凌霄一門靈官演法湛然傳應法師祠四堂鐘樓齋庖廡廡將二百楹位置雖劣租庭猶足為自關而西名山福地土木之冠嗚呼上清作為宋太平興國中出內帑殫西土財力為之既其毀也乃復於道流數人之身真人生逝於金而見贈於皇元真人

生逝皆在山東其徒教行關西擇勝地以祠其祖亦事理之不可必究者也彼真人者果能不死排空御氣載營而西顧不抵掌雲中曰吾孫若曾亦有可才如是者耶詩曰少正純重兮四君皆陽生不並時兮名相襲芳豈以陽者兮本天親上輕舉凌空兮易為向往何獨一君兮海蟾自名將取月魄兮隨日受明日月為易兮衛生要訣世微五君兮與疑誰析又嘗思之兮少正塘純歷世綿邈兮絕學無人嗚呼重陽兮纔七弟子有婦人焉兮六人而已父雄子良兮中有玉陽體玄廣度兮始人為狂行歌市中兮望道未見從學崑崙兮識習一變離隱查山兮旋徙雲光冬眠抱雪兮夏立迎陽九年德就兮鬼盜避逐騰神入夢兮群異傍出莫毒匪鳩兮持飲如漿名藹燕都兮徵來天長衛生為治兮宸宸問益鴻言剖疑兮中夜前席別建修真兮還山固求鳳翼承旂兮邈不可留歸軫經時兮世宗不豫章廟累起兮奏章帝所惟不拒人兮崇福玉虛華陽天寶兮不恒其居在在授業

其出一戶繇子暨孫兮獨踰萬數東海之波兮百里涵濡今焉西流兮溢及鎬都太平之宮兮古仙聖宅一孫十曾兮剪棘攸作身生不西兮逝未百年而教之西兮他門孰先碑其平生兮道行彌晰爾祖爾思兮來裔無歎

廣寧通玄太古真人郝宗師道行碑

嘉議大夫嶺北湖南道提刑按察使兼平徐瑛撰

大元有天下好賢樂善度越前古凡有德之士不及用者必加寵數以旌顯之初無聞於道俗存亡之異也中統二年詔賜盤山棲雲道人王志謹之號曰惠慈利物至德真人至元六年詔贈棲雲之師廣寧郝大通之號曰廣寧通玄太古真人至元二十三年詔賜棲雲弟子洞陽徐志振之號曰崇玄誠德洞陽真人旌有德也是年三月予將赴官湖南道出汴梁時洞陽掌本宗教住朝元宮率其屬來見請於予曰貧道出家無過人之行誤蒙聖朝采錄錫以徽稱使得蓬於師真之列皆吾先師棲雲之訓也棲雲之所以表見於世

者獨非先師太古之澤也歟二師道行卓異  
在人耳目孰不知之必得文士與之紀述庶  
幾可以傳信後來昭示永久棲雲則有翰林  
承旨慎獨王公之作已勒之石若夫太古之  
碑義不可後而今尚缺然是則嗣教者不敏  
之過願屬筆於子儻辱惠顧我曹之責塞矣  
予自惟儒生昧於玄學叙事遺辭或致抵牾  
徒取誚於識者牢讓再三竟不獲已又洞陽  
與予同宗見待素厚難於終拒乃據洞陽所  
錄宗師行實採撫綴緝以付之仍繫以銘詩  
俾步虛者歌之以頌師德師姓郝名大通字  
太古道號廣寧子寧海人家故饒財為州首  
戶兄俊彦登進士第官至朝列大夫昌邑縣  
令師初諱昇少孤事母孝稟賦穎異識度夷  
曠蕭然有出塵之資讀書喜易研精尤甚因  
洞曉陰陽律曆之術不樂仕進慕司馬季主  
嚴君平之為人以卜筮自晦大定七年重陽  
真君王祖師自關西寧海遊行於市見師言  
動不凡仙質可度思所以感發之者遂背肆  
而坐師曰請先生回頭真君應聲曰君何為

不回頭耶師悚然異之真君出師閉肆從之  
及於館所而請教焉真君授以二詞師大悟  
不覺下拜自是日往親炙以有老母未即入  
道明年母捐館師乃棄家入崑崙山禮真君  
於煙霞洞求為弟子真君納之賜名璘號恬  
然子仍解納衣去其袖而與之曰勿患無袖  
汝當自成蓋傳法之意也九年寧海人有構  
金蓮堂以待真君挈其徒西歸居之師携瓦  
罐乞食誤觸之碎真君別授一罐題頌其上  
云撲碎真瓦罐却得害風觀直待悟殘餘有  
箇人人喚未幾師辭真君去與王玉陽往居  
查山真君亦赴汴京馬丹陽譚長真劉長生  
丘長春四子實從十一年師聞真君上仙四  
子已入關遂西遊以訪之十二年葬真君於  
祖庭師欲與四子同廬墓側長真激之曰隨  
人脚跟轉可乎師明日遂行至岐山遇神人  
授今名字及道號十三年度大慶關而東朔  
翔趙魏間十五年坐於沃州石橋之下緘口  
不語河水泛溢身不少移水亦弗及人饋之  
食則食無則已雖祁寒盛暑兀然無變身槁

木而心死灰如是者六年昌邑君之季女嫁  
為真定郭長倩之夫人長倩夫婦過沃州知  
師在橋下駐車拜謁贈之衣物所以存慰者  
甚厚師藐然若不相識一無所受夫人感泣  
長情嗟異而去二十二年師過灤城又與神  
人遇受大易秘義自爾為人言未來事不差  
毫髮至鎮陽居觀升堂演道遠近來聽者常  
數百人已而闡化諸方專以利物度人為務  
由是郝太古之名聞天下明昌初東還寧海  
一日欲作易圖遠索紙筆適粥熟弟子不即  
與請俟食已師曰速持來我方得意何暇食  
粥筆入手布紙揮染疾若風雨不終朝成三  
十三圖其旨意皆天人之蘊奧昔賢所未發  
者咸平高士王賢佐占筮素精見師推服盡  
棄其學而學焉由是技進名動闕庭其他靈  
異之跡如天長預告侯子真之火恩州夜入  
王鎮國之夢者尚多有之不可殫紀春秋七  
十有三以崇慶元年臘月晦日仙蛻於州之  
先天觀前比三年勅其徒預營塚壙告以死  
期及是果然平生製作有三教入易論一卷

示教直言一卷心經解一卷救苦經解一卷  
周易參同契簡要釋義詩賦雜文樂府及所  
作易圖號太古集凡十五卷行于世噫道家  
者流其源出於若莊後之人失其本旨派而  
為方術為符籙為燒鍊為章醮派愈分而迷  
愈遠其來久矣迨乎金季重陽真君不階師  
友一悟絕人殆若天授起於終南達於崑崙  
招其同類而開導之鍛鍊之初立一家之教  
曰全真其修持大畧以識心見性除情去欲  
忍恥含垢苦己利人為之宗老氏所謂知其  
雄守其雌知其白守其黑知其榮守其辱為  
道日損損之又損以至無為莊生所謂游心  
於淡合炁於漠純純常常乃比於狂外天地  
遺萬物深根寧極才全而德不形者全真有  
之老莊之道於是乎始合重陽唱之馬譚劉  
丘王郝六子和之天下之道流祖之是謂七  
真師其一也非天授之其孰能與於此哉師  
逝之後弟子行緣四出能世其業者甚眾高  
弟范玄通與棲雲王宗師又其尤者當中原  
板蕩國朝隆興之初一居東平一往來乎燕

汴建琳宇開玄壇聚徒講說貴賤欽仰宗風  
大振道價增崇不減太古今洞陽者艾敦庵  
剛毅木訥食師之德幹父之豎當釋道紛爭  
摧敗挫切之際寂然湛然守之以謙冲安之  
以委順處之以鎮靜操修無方精進不輟用  
能上取聖知特降璽書褒美較其難易又不  
出於棲雲之下謂非太古之澤將何歸乎凡  
今之人欲知太古請觀其子欲知其子請觀  
其孫銘曰東方雲海空復空群仙出沒空明  
中此語常怪東坡公神仙有則八表同不應  
秀止東方鐘崑崙山高天比崇左顧右瞰搏  
桑宮上有一洞煙霞封重陽發之魔鬼上紫  
炁直與閻浮通馬譚劉丘王郝從六子矯矯  
皆人雄縹緲至自蓬萊峯鸞見碧海磨青銅  
煌煌七朶金芙蓉信哉仙人出於東就中郝  
公鸞鳳龍洗心以易虛玲瓏藏用於密退以  
冲執糠富貴不掛胃剛決物莫嬰其鋒訓練  
復遇王元戎衲衣一傳神契融有袖無袖由  
人縫同門之朋種與種脚跟不必隨渠僕沃  
州石橋張果蹤亘如虹蜺神蒼穹大道在此

南北衝何須遠走巢雲松止而不動吾非慵  
良乃萬物之始終結跏趺坐為齋擊朝觀日  
出光曠腫吞霞入腹丹火紅暮觀流波朝彼  
宗河車挽水玄霜蓬有人問之趨下風如以  
寸筵撞巨鐘揺手使去妨吾功過橋行人抗  
塵容僵名什利不有躬見公視世猶蟻蜂形  
骸土木心冥鴻願必有泚羞頑庸反求於身  
當發蒙搏貪節愛瘵瘵恻憫憧憧往來秋夏冬  
百感一二亦已豐如此利益誰能窮確乎六  
年真苦攻養成蛇女連嬰童奮袖起舞知德  
充願以所餘及恁侗普度一切超樊籠泥在  
鈎兮金在鎔螟蛉螺贏無常蟲功成朝元去  
忽忽飛霞佩玉鳴冬隆雲裝煙駕滄溟重弱  
水萬里昏濛濛淮南小山空桂叢黃芽欲種  
須團農公不可見憂心冲棲雲老仙亦難逢  
住世賴有徐神翁

七真讚

北平王梓子正述

重陽王真人

出應道運豪雄絕倫甘河得遇兀若狂人挈



還四師大開全真巍巍法教東海西秦

丹陽馬真人

晚契奇因盡捨家貲千朝得道三警承師風  
雷示化金玉垂辭邈矣前躅如何可追

長真譚真人

一見師真痼疾頓愈決烈入道水雲為侶歸  
櫬終南聚徒洛土教風既弘蛇然高舉

長生劉真人

童真之力聖賢所扶風姿秀異洛市工夫中  
遭厄鬱所守不渝聲名卒顯被召海隅

長春丘真人

猗歟長者不可復得三朝推尊才學功德懸  
此兵戈遠涉西北九九乃終世人莫測

玉陽王真人

幼遇玄庭再禮重陽飛傘送號金蓮共芳跡  
多神異名動帝王高山景行千載雲光

廣寧郝真人

雖出閭閻獨喜林泉兩詞一衲終始師傳神  
示易秘沃橋六年化緣逆順悉合自然  
甘水仙源錄卷之二

甘水仙源錄卷之三

息三

夷門天樂道人李道謙集

清和妙道廣化真人尹宗師碑銘序

汝陽弋穀撰

宗師全真嗣教六世祖也自守真緒風化鼎

盛什百於疇昔形器之域古今同盡春秋八

十有三遠有拂衣啓手之嘆以辛亥二月六

日昇于大房山清和宮之正寢寢神五華山

者幾十稔矣嗣教誠明張公一日語衆曰清

和師思報祖師之恩遂大葬之禮仍即其福

地並建宮宇勝槩甲天下弘闡祖道功越古

今吾儕享其成業今無一報顏實腴矣將刻

碑紀實以詔無窮若何僉曰唯遂以中統三

年十月吉日徵文於汝陽弋穀僕以師真道

德高厚與妙無方詎以荒踈淺淺者所能窺

測形容哉固辭不可謹按門人馬志通所紀

行狀仍撫其功德之著見於耳目者序述之

夫道之在天下而已惟天之所以卑付於

聖賢者無不備其所以濟斯世而見於功用

者或久近廣狹之不齊何哉曰時也時非聖

賢所能必能不滯其時而已或拱揖廊廟或

私淑側陋或清靜而化揖讓而治或平水土

降播種或放伐以救焚溺或寬默以革苛偽

文勝質喪則示還純反朴之訓禮壞樂崩則

正三綱五常之教大則天下後世小則一郡

一邑隨機應變與物推移要不過乎徇道以

濟斯世耳由跡以觀之功用之不齊者所遇

之時異也則天之以是道而畀付於聖賢者

曷嘗有二哉道猶水也渴則為酌飲旱則為

灌溉道猶火也飢則為烹飪寒則為煦嫗用

雖不同而水火曷嘗有二哉頃以金錄訖運

喪亂並與黔黎殄於蕝醢玉石燼於烈火天

意開顧挺生至人全昇斯道以假授之之手

於是重陽而後丹陽長真長春繼出而

全真之教興及清和接長春之統授受之際

累聖之妙無餘蘊父作子述闡化數十年徒

侶徧天下聞望重朝野風之所靡狼戾易心

強梗順命革煩苛為清靜化湯火為枉席挈

一世鄙天之民躋之仁壽之域自古教法之

盛功德之隆惟清和師為最蓋天之畀付之